

Die erschd Zigaredd

Hermonn unn Walder, zwei Lausbuwe klään,
ware unzerrennlische Freinde gewään.
Die zwei beschreib ma om Beschde so:
Gugge beim Willem Busch – bei Max unn Moritz – noh.
Als Erschdklässler honn se - wie immer unn iwwa-all –
So aach in da Schul zesommegehall.
Ma hat ne ingedrischdert unn ingebleit
Wie wischdisch die Schul is fa klääne Leit:
 Wenn ihr späda mol ebbes werre wolle,
 misse na die Große zum Beischpiel eisch holle.
 Uffpasse unn gugge wie´s die onnere mache.
 So kinne na leischd lehre die schwere Sache.

Froh unn munda, weil jo ze zwett
bekanntlich alles besser gett,
sinn die zwei in die Schul – jede Dah.
Sie honn nie gezonkt, sisch gudd vadrah.
Unn uff ämol war´s trotzdem soweit:
Ohngefong dadda so – de Schreid.
Uffem Schulhof hat e Kloheisje geschdonn.
In da Paus sinn die Große do dehinna gong.
Hermonn unn Walder honne nohschpionniert,
honn gesiehn, wie die es Zigaredderaache probiert.
 Hermonn, luh mol, das probiere mir aah.
 Jo, Walder, om beschde morje am Wonnadah,
 wenn die Klass ausem Schulhof duud maschiere.
 Die Zigaredde bring isch, es Fixfeier du.
 Sollschd emol siehn, das klabbt im Nu.

Es hat geklabbt – unn froh nit wie!
Do war vorbei die Harmonie.
Weil jeder nohm Raache – unn zwar uff die Schnell –
Erreische wold e gewissi Schdell.
Mitenonner sinn se abgewetzt.
Zu allem Elend war ihr Ziel besetzt.
Vunn äänem uff´s onnere Bään sinn se geträhd.
Wenn do drinn der sisch doch nur beeile däht!
Sie knobbe unn stubbe – die Rollserei war im Gong;
kääner hat meh gewusst, wer ohngefong.
Jeder wollt de erschde sinn, weil´s halt pressiert.
Unn das hat donn zum Krach gefiehr.
Sie honn sisch ordentlich vakammisseeld
Unn zugepetzt unn sisch gequeeld,
bis es donn alle zwei war klar,
dass sowieso zu schpäd´s jetzt war.
Ään Glick, die Sulzbach war noch nit kannalisiert!
So honn se statt em Wonnerdah e Wäschdah vollfiehr.
Das hat sisch schnell erumgeschwätzt.
De Lehrer hat´s ne donn gewetzt.

Eischentlich wäre se jo genuch geschdrofd gewään.
Awwer de Lehrer hat 's onnerschd gesiehn.
Unn die Schdrofe domols haschde long nit vagess:
Drei Dah long haschde liewer geschdonn wie gesess.
Onn Schdrofmeschlichkäade hat 's domols nit gefäald:
Kniesjer, Ohrklabbe, Berjewänscha honn die Lehrer vadäald.
Das war 's nit wärt. Unn die zwei honn sisch gesaht:
Nie widda! So gudd hat die Zigaredd aach nit geschmaagt!

Helene Keller

